

## Тақсимот

05:00 / 07.03.2017 4115

Эй дўст, дунёнинг бор шавкати, бойлигу сарвати, орому лаззати – барин сенга атадим.

Менга берсанг кифоя мўминлик заҳмати, иймоннинг лаззати.

Эй дўст, сенга қўш қўллаб тутдим мансабларнинг энг зўрини, давраларнинг энг тўрини, яхши яшаш сурурини.

Мендан дариғ тутилмаса бас Аллоҳимнинг нури, бандалик ғурурини.

Эй дўст, муҳташам қасрлар ҳам, ширин-шакар наслар ҳам, ажабтовур базмлар ҳам, майли, сенга бўлақолсин,

Мен эса умидворман Аллоҳнинг раҳматидан, бисёр мағфиратидан.

Эй дўст, сендан асло талашмайман дунёдаги омадларни, кўз илғамас сарҳадларни, хўп кўзланган мақсадларни.

Асли орзуим менинг иймоннинг ҳаловати, охират саодати.

Эй дўст, фойданга кечиб бўлдим офатижон сулудан, кўз қамашар уловдан, дунёдаги бор тушовдан.

Умидим менинг осон кечган сўровдан, оху кўзли ҳавродан.

Эй дўст, ширин-шакар неъматлар ҳам, оромижон хилватлар ҳам, кўз ўйнатар хилъатлар ҳам бари сенга ҳадядир.

Жаннатнинг фароғати, Пайғамбар шафоати менга қолса кифоя.

Эй дўст, бор ишларнинг хайрлари ҳам, дунё кезиш сайрлари ҳам, кўнгил очиш сайллари ҳам сенга тухфа бўлақолсин.

Менинг ёлғиз умидимдир – Парвардигор жамоли.

Эй дўст, майли фоний дунёда роса ўйнаб-кулиб қол, дунёнинг бор молини майли якка ўзинг ол.

Фақир банда топса бўлди Аллоҳнинг розилигин. Шудир асли яшамоқнинг мазмуни.

Сўзларимга бир шоирнинг ушбу назмин илова қилдим:

Бу дунёга кўз очиб келган ҳар кас,

Бахтли яшамоқнинг турфа йўлларини излайди.

Бахтини, иқболини, омадини тезроқ топиш учун

ҳолдан тойган қирчанғи отига

тинмай қамчи босиб-тезлайди.

Кимлардир бахтини юксак тоғлардан излаб,

Тубсиз дараларда топаркан ўлимини.

Яна кимдир саройларга бахт ахтариб бориб

подшоҳларнинг ялоғига тикади қўш қўлини.

Қайсидир телба ошиқ бевафо пари ишқида

Хонумони, давлатини бой бериб қўйиб,

"Мен Мажнунман!" дея кўксига уриб ётса ҳам,

Умри поёнигача аслида

бир ёсуман ҳажрида юраркан куйиб.

Кимдир топган бойлигининг ҳидига маст бўлиб,

Кечалари ухламай чиқар: безовта, олазарак, дили тўла ғам.

(Бу бойликлар ўзига вафо қилса қанийди).

Неча бор санаб чиқар, қизғаниб ҳатто бола-чақасидан ҳам,

Охири бир золим ё муттаҳамга "топшириб", тинчийди.

Кимдир шоҳона емакхонада ноёб таомларни тўйиб ейишни

бахт санайди.

Яна кимдир учун бир фоҳиша аёлнинг  
мингта эркакка қилган сохта ишваси туганмас саодат.  
Кимгадир бола-чақа, яна кимга саломат юриш,  
Баъзиларга эса ҳатто кўп яшаш саналаркан бахт.  
Аслида...  
Бу дунёнинг бутун сарвати арзимади бир томчи ёшга  
Аллоҳдан қўрқиб тўкилган...

Аҳмад МУҲАММАД